

AL-HIKMAH

Jilid	6	ISSN 1985-6822	2014
No.	2		1436

- DIMENSI HAFAZAN DAN RASIONAL DALAM KURSUS WAJIB FAKULTI PENGAJIAN ISLAM UNIVERSITI KEBANGSAAN MALAYSIA ...3-14
Wan Ahsani Fadhilah Wan Mahmud Khairi & Muhamad Faisal Ashaari
- CABARAN DAN POTENSI MAJALAH DAKWAH BERBAHASA MELAYU DI MALAYSIA TERHADAP TREND PEROLEHAN PERBELANJAAN IKLAN (ADEX)...15-28
Shahrul Nazmi Sannusi
- AGENDA HASAN AL-BANNA DALAM PEMBANGUNAN INSAN MENERUSI PENULISAN KARYA *MAJMU'AT AL-RASAIL* ...29-42
Zainudin Hashim & Fakhru Adabi Abdul Kadir
- STRATEGI MODEL PEMBANGUNAN INSAN SEIMBANG PENGAJIAN AGAMA (PISPA) BERDASARKAN TEORI PERUBAHAN SOSIAL IBN KHALDUN DALAM PENGAJIAN AGAMA DI UNIVERSITI KEBANGSAAN MALAYSIA ...43-52
Zaizul Ab. Rahman, Indriaty Ismail & Khaidzir Ismail
- PERLAKSANAAN PROGRAM TAKMIR SEBAGAI MEDIUM PENGIMARAHAN MASJID DI NEGERI SEMBILAN ...53-64
Shuhadak Mahmud & Ibnor Azli Ibrahim
- PENGGUNAAN MODUL DAN BUKU BAHASA ARAB UNTUK ORANG AWAM ...65-77
Suhaila Zailani @ Hj. Ahmad & Nur Afifah Fadzil
- MEMBINA PENGISIAN BERPENGARUH DALAM MEDIA BAHARU MELALUI PENULISAN DAKWAH ...78-90
Ahmad Zahiruddin Mohd Zabidi & Faisal @ Ahmad Faisal Abdul Hamid
- PERLANGGARAN TATASUSILA AGAMA DALAM KALANGAN ANGGOTA POLIS DI IBU PEJABAT POLIS BUKIT AMAN, KUALA LUMPUR ...91-107
Nik Daud Raja Hussein & Rosmawati Mohamad Rasit
- PEMIKIRAN POLITIK DAN KENEGARAAN MUHAMMAD IQBAL .108-118
Abdullah Firdaus, Idris Zakaria & Mohd Nasir Omar
- KEPIMPINAN DALAM KISAH NABI SULAIMAN AS DENGAN HUDHUD ...119-128
Muhammad Amin Hasan, Mohd Azrul Jaafar Ahmad Irdha Mokhtar, Anuar Puteh, Zulkefli Aini & Mohamad Zulkifli Abdul Ghani
- THE REALISATION OF COVERING 'AURAT AMONG THE SUCCESSFUL WOMEN IN MALAYSIA ...129-143
Naemah Hamzah, 'Adawiyah Ismail, Mohd Ismail Mustari & Bushrah Basiron
- THE ROLE OF SHEIKH WAN AHMAD AL-FATANI IN THE MALAY PUBLICATIONS AND PRINTING IN THE MIDDLE EAST ...144-153
Ermy Azziaty Rozali

Al-Hikmah 6(2) 2014: 108-118

Pemikiran Politik Dan Kenegaraan Muhammad Iqbal

Muhammad Iqbal's Political and National Thought

ABDULLAH FIRDAUS
IDRIS ZAKARIA*
MOHD NASIR OMAR

ABSTRAK

Makalah ini bertujuan untuk mendedahkan pemikiran politik Muhammad Iqbal dan melihat bagaimana pandangan tokoh berkenaan dalam mengemukakan dasar negara dan konsep pentadbiran negara. Artikel ini berdasarkan kepada sebuah penyelidikan yang telah dilakukan dengan menggunakan menggunakan metod analisis deskriptif kualitatif. Hasil kajian menunjukkan bahawa konsep negara Islam adalah berdasarkan kedaulatan Tuhan, prinsip tauhid telah menjadi asas pembangunan masyarakat Islam (Millat), melalui pembinaan karakter individu yang berdasarkan persamaan, perpaduan dan kebebasan berpandukan wahyu dan Tradisi Kenabian.

Kata kunci: *Negara Islam, kedaulatan Tuhan, pembangunan masyarakat Islam*

ABSTRACT

The purpose of this article is to expose the political thought of Muhammad Iqbal and to see what he thinks about the policy and administration concept of the country. The article is using the qualitative descriptive analysis method. The findings of the study showed that since this Islamic country is based on the God's sovereignty, the principle of tauhid has become the fundamental development among the Muslims (Millat) through individual's character development based on similarity, solidarity and freedom guided by the revelation of the Prophetic tradition.

Keywords: *Islamic country, God's sovereignty, Millat*

PENDAHULUAN

Para ahli sejarah hampir bersepakat bahawa abad ke-20 sering digambarkan sebagai abad nasionalisme. Pernyataan seperti ini sangat relevan dengan apa yang berlaku di seluruh benua khususnya di benua Asia. Kemunculan gerakan kemerdekaan bergema di pelbagai belahan

bumi bagi melepaskan diri dari segala bentuk penjajahan menjadi sebuah fenomena yang menglobal. Pada ketika itu kebanyakan bangsa Timur atau tepatnya dunia Islam sedang mengalami krisis moral dan sosial sebagai akibat daripada keruntuhan intelektual dan spiritual. Di samping purata kemiskinan yang meningkat yang berlaku dalam kalangan umat Islam, ia juga sebagai akibat berlakunya dominasi politik dan intelektual imperialis barat yang sering menindas kemanusiaan dan merendahkan bangsa timur (Howard 2006: 21). Di India kemunculan para pejuang dari pelbagai lapisan masyarakat yang bangkit melawan kezalimanyang menimpa mereka. Antara bentuk perlawanan itu ialah melalui penstrukturan semula pemahaman terhadap Islam yang dilakukan Muhammad Iqbal. Bagi Iqbal Islam merupakan sumber kekuatan untuk hidup lebih baik dan lebih mulia.

BIOGRAFI RINGKAS

Iqbal dilahirkan di Sialkot-India, sebuah kota lama yang bersejarah di Punjab Barat dan Kashmir pada tanggal 9 November 1877 bersamaan 2 Zulkaedah 1294H (Abdul Wahid 1964: 28) dan wafat pada 21 April 1938. Iqbal berketurunan bangsawan Brahmin Kashmir. Iqbal dibesarkan di persekitaran yang taat dengan agama. Ayahnya Shaikh Nur Muhammad adalah lelaki yang taat dalam mengamalkan tasawuf. Manakala ibunya, Imam Bibi juga seorang wanita yang taat beragama, meskipun dari kalangan masyarakat pekerja, yang tidak diberi peluang untuk belajar di sekolah formal, tetapi pengetahuan tentang ilmu agama yang tinggi.

Persekitaran dan didikan yang tinggi dengan nilai-nilai Islam yang diterima Iqbal sejak kecil menjadi faktor yang membentuk perwatakan Iqbal dalam memandang Islam sebagai sumber kekuatan dalam hidup ini. Dalam peringkat sekolah rendah, Iqbal mendapat bimbingan daripada Sayyid Mir Hasan, seorang tokoh pendidikan ternama meskipun tidak menguasai bahasa Inggeris, namun beliau memiliki konsep dan pemikiran yang maju dalam bidang pendidikan. Sayyid Mir Hasan mengajar Iqbal bahasa Arab, peradaban serta dan budaya Islam (Mumtaz 1982:74).

Setelah tamat pengajian di Sialkot, Iqbal meneruskan pengajian di Government College di Lahore. Pada tahun 1897, Iqbal berjaya mendapatkan Ijazah Sarjana Muda dan Sarjana pada tahun 1899 dalam bidang falsafah pada yang sama. Pada tahun 1905 hingga tahun 1908, beliau meneruskan pengajian peringkat kedoktoran di Munich-Jerman dengan tesis bertajuk *The Development of Metaphysics in Persia*. Iqbal juga telah menamatkan pengajian dalam bidang hukum di Lincoln's In di Cambridge. (Abdul Wahid 1964). Sekembalinya dari Eropah pada

tahun 1908, Iqbal dilantik menjadi tenaga pengajar di Lahore dan bekerja sambilan sebagai peguam. Kepakaran Iqbal dalam bidang falsafah dan pengetahuan mengenai sejarah kebudayaan Islam serta kesedaran politik yang tinggi membolehkan Iqbal melihat realiti sebenar yang berlaku ke atas umat Islam di benua India. Walaubagaimanapun pada tahun 1910, Iqbal mula memberikan perhatian yang serius ke atas pelbagai aktiviti Liga Muslim dan belum membabitkan diri secara aktif ke dalam mana-mana pertubuhan dan politik. Namun sejak tahun 1926, bermula di Punjab, Iqbal secara proaktif mula terlibat dalam politik (Asif 1977: 73).

Muhammad Iqbal dikenali sebagai tokoh yang multi-dimensi, seorang ahli falsafah, seniman dan ahli politik yang handal (Moizuddin 1982:21). Karya ciptaannya menekankan tentang pentingnya kesejagatan Islam yang berteraskan tauhid (Mumtaz 1982:81). Meskipun begitu banyak cabaran dan rintangan, namun beliau tetap teguh pada pendiriannya “*I have no need of the ear of today, I am the voice of the poet of to-morrow*” (Nicholson 1969: 3).

Usaha menangani masalah keruntuhan spiritual dan penjajahan intelektual dalam persoalan agama, sosial dan politik dalam kehidupan umat Islam telah dilakukan oleh Iqbal dengan cara membangunkan semula falsafah keagamaan Islam dalam mencapai kemajuan dan perkembangan pengetahuan moden umat manusia dalam pelbagai bidang (Iqbal 2006: vi). Sebagai tokoh intelektual, seniman dan ilmuwan, Nicholson (1969: xxxi) menyifatkan Iqbal sebagai manusia yang merentasi pelbagai zaman “*he is a man of his age, and a man in advance of his age, and he is also a man in disagreement with his age*”.

Syair merupakan medium utama bagi Iqbal dalam menenangkan pemikirannya. Beliau juga mampu menguasai budaya dan bahasa Persia iaitu bahasa rasmi para pemimpin Islam dan bahasa peradaban Islam di bahagian Asia Timur (Mohammed Maruf 1977:73).

KONSEP POLITIK: TAUHID SEBAGAI ASAS POLITIK

Jika diperhatikan secara teliti, teori negara Islam dan konsep politik Iqbal, terhimpun dalam dua penulisan syair falsafah Iqbal, *Asrar-i-Khudi* dan *Ramuz -i- Bekhudi* (Gardon 1971:118). Kedua-dua konsep tersebut telah mendapat sentuhan akhir dalam *The Reconstruction of Religious Thought in Islam* yang beliau hasilkan selama tiga tahun (Riaz 1977:45). Karya tersebut merupakan hasil penulisan Iqbal yang menunjukkan kehebatan gagasan dan pemikiran Iqbal yang telah mengubah sejarah, secara khusus umat Islam India. Karya ini dinilai oleh ramai cendekiawan sebagai karya Iqbal yang cemerlang (Moizuddin 1982: x).

Teori *Khudi*, membawa pengertian konsep pembangunan masyarakat atau negara daripada pembangunan individu. Kemunduran umat Islam disebabkan hilangnya kesedaran terhadap peranan diri itu sendiri. Kemajuan hanya diperoleh melalui kesedaran terhadap peranan diri (Iqbal 1977:77; Riaz 1977:45). Individu dan *Millat* memiliki sifat kesepaduan. *Millat* menjadi kuat kerana disokong oleh individu yang kuat dan lebih menyerlah apabila ditentukan oleh kadar dan nilai sumbangannya. Melalui syairnya, Iqbal memberi semangat terhadap umat Islam “*Be Void of Fear, grief and anxiety, be hard as a stone, be a diamond*” (Nicholson 1969:106).

Iqbal berpandangan bahawa dalam merealisasikan ajaran Islam agar sentiasa hadir dalam segenap aspek dimensi kehidupan ini adalah dengan melaksanakan tugas dan tanggungjawab yang mulia seseorang mukmin. Hal ini memandangkan bahawa Islam dari aspek sosial bererti menterjemahkan dasar-dasar agama ke dalam realiti kehidupan. Al-Qur’an itu, kitab suci yang lebih banyak menekankan kepada aspek perbuatan daripada teori sahaja (Iqbal 2006:v). Pada pandangan Iqbal (2006), Islam bukanlah suatu perkara yang remeh, bukan tertumpu aspek pemikiran atau persoalan perasaan dan juga bukan perbuatan sahaja tetapi Islam adalah ekspresi tentang diri seseorang secara menyeluruh (Iqbal 2006:2; Muhammad Aziz 1965:4).

Sebuah integrasi yang kukuh antara agama dan negara di mana Islam itu diibaratkan sebagai satu wajah yang memiliki dua sisi yang sama. Dari satu sudut ia adalah gereja manakala dari sudut yang lain ia adalah negara (Iqbal 2006:182). Berdasarkan perspektif Islam negara berperanan dalam menanamkan konsep Tauhid dalam kehidupan seseorang itu. Iqbal (2006:182) berpendapat, konsep tauhid sebagai kerangka pemikiran (*working idea*) dalam mengimplikasikan nilai persamaan antara manusia (*equality*), semangat persaudaraan sesama manusia (*solidarity*) dan kebebasan (*freedom*). Fungsi negara adalah sebagai penguatkuasa pelaksanaan tauhid atau kepatuhan kepada Allah yang berdasarkan dasar persamaan, kebebasan dan persaudaraan sesama umat manusia. Islam sebagai sebuah *siyasah* untuk menjadikan dasar tauhid sebagai faktor yang hidup dalam pemikiran dan perasaan kehidupan umat manusia (Iqbal 2006:175).

Agama dan negara saling berhubung kait antara satu dengan yang lain. Jika sebuah kepercayaan (*faith*) tidak disokong oleh kebijakan pentadbiran negara, maka agama menjadi falsafah yang hanya wujud dalam logik akal. Peranan negara sebagai alat untuk merealisasikan nilai dan ajaran Islam telah banyak dibincangkan oleh tokoh muslim sebelum Iqbal, seperti Abu al Hasan al Mawardi dalam *al-Ahkam al-Sultaniyyah* juga Ibn Taymiyyah dalam *al-Siyasah al-Syar’iyyah fi Islah al-Ra’i wa al-Ra’iyyah*, yang berpandangan bahawa

politik sebagai alat atau wasilah untuk mencapai kehendak dan kebenaran agama (Idris 2014:31).

Muhammad Asad (1999:30) menjelaskan bahawa matlamat akhir sebuah negara dalam perspektif Islam adalah bagi melestarikan politik dan kerjasama dalam kalangan umat Islam. Negara berfungsi sebagai alat untuk mewujudkan kesejahteraan rakyat berdasarkan persamaan, keadilan dan amar maruf nahi mungkar.

Islam bukan sekadar agama atau nama sebuah keyakinan atau sebuah bentuk peribadatan saja. Agama sesungguhnya adalah sebuah ideologi hidup, sebagai falsafah hidup yang mempunyai peraturan yang emosi manusia secara mendalam. Ia memberi arahan dan bimbingan ke atas manusia semenjak daripada buaian sampai ke liang lahad, dari alam kubur hingga ke alam akhirat. Menurut Iqbal (2006), Islam merangkumi pelbagai aspek kehidupan manusia. Sejurus ketika pulang dari Eropah pada 1908, Iqbal menyatakan:

Islam lebih daripada sekadar akidah, ia juga bererti sebuah umat, sebuah negara. Keanggotaan Islam sebagai sebuah *millat* tidak ditentukan oleh tempat kelahiran ataupun kedudukannya. Ia terwujud dalam sebuah identiti keyakinan (Abdul Wahid 1964:51).

Iqbal (2006:175) berpendapat negara Islam adalah berteraskan kepada Tuhan, sebagai Sumber Utama kehidupan (*God is the Ultimate Spritual basis of all life*) atau dalam ungkapan yang lain *Allah is the measure of all thing*. Oleh kerana itu, prinsip tauhid yang dijelaskan oleh Iqbal adalah berlakunya hukum dari Tuhan dalam bentuk yang mengatur penyelenggaraan dan pentadbiran negara secara komprehensif. Menurut Mohammad Aziz 1965, kedaulatan Tuhan (*sovereignty of god*), negara Islam berlandaskan kepada Al-Qur'an yang merupakan kehendak Allah. Merujuk kepada syariat Islam sebagai sumber hukum dan etika, maka kebebasan individu itu dijamin oleh hukum. Oleh demikian, peranan dan fungsi para ulama sangat diperlukan bagi membuat interpretasi hukum Islam (*ijtihad*) dalam menangani pelbagai keperluan semasa yang sentiasa berubah-ubah.

Dalam pandangan Iqbal, umat Islam India sudah semestinya memiliki suatu wilayah tertentu untuk menentukan nasib mereka sendiri. Konsep ini mula disampaikan oleh Iqbal dalam perhimpunan tahunan pertubuhan Muslim India (*All-India Muslim League*) di Allahabad 1930. Iqbal menginginkan sebuah negara merdeka bagi umat Islam India:

Aku sangat ingin melihat Punjab, Provinsi sempadan Barat Daya, Sind dan Baluchistan menjadi sebuah negara, memiliki

pemerintahan sendiri sama ada di dalam atau pun di luar kekuasaan British. Terbentuknya negara India muslim di Barat Daya bagi ku merupakan ketentuan akhir bagi nasib umat muslim, sekurang-kurangnya di Barat Daya India (Abdul Wahid 1964:171; Riaz 1977: 21).

Hasrat Iqbal yang begitu kuat mewujudkan negara Islam merdeka di bumi India, dijelaskan dalam dokumen berbentuk 13 pucuk surat Iqbal kepada Quaid Azam, Ali Jinnah. Meskipun semasa hidupnya, Iqbal tidak sempat menyaksikan negara Islam yang merdeka seperti yang diimpikannya (Asif 1977:73).

BENTUK PEMERINTAHAN DAN SISTEM PENTADBIRAN NEGARA

Setelah menganalisis semua teori dan sistem pemerintahan yang pernah ada dalam sejarah Islam, meliputi sistem khalifah yang berbentuk monarki, atau sistem pemerintahan yang dipimpin Imam yang menerima mandat dari Tuhan seperti fahaman Syiah ataupun sistem yang berdasarkan bentuk pilihan rakyat atau republik sebagaimana yang digagaskan oleh Khawarij (Abdul Wahid 1964:62-75). Akhirnya Iqbal menyimpulkan bahawa 'Sistem Republik' sebagai sebuah sistem kerajaan dan sangat sesuai dengan ruh Islam (Mahammad Aziz 1965:39).

Selain itu, dalam mengetengahkan konsep politiknya, Iqbal menjadikan sejarah dan ajaran Islam itu sendiri sebagai landasan berpolitik. Hal ini memandangkan dalam Al-Quran, metode sejarah dan fakta empirikal juga merupakan sumber pengetahuan (Iqbal 2006:144). Iqbal juga merumuskan dua dasar etika politik dan sistem penyelenggaraan negara Islam. Pertama, prinsip *sovereignty of God*. Dasar ini menjelaskan tentang Hukum Tuhan adalah yang tertinggi, ketua negara, hanyalah pelaksana undang-undang ilahi yang tidak memiliki hukum. Etika dan hukum pentadbiran negara adalah berlandaskan kepada wahyu. Konsep jihad dari perspektif Islam harus difahami sebagai tindakan dan sikap yang dilakukan oleh umat Islam bagi membela diri dan menegakkan kebenaran (Abdul Wahid 1964:31-55; Mohammad Aziz 1965:62).

Kedua, prinsip *Equality of People*, di mana konsep ini berlandaskan kepada konsep kesamarataan. Hak dan kewajipan untuk segenap rakyat adalah sama di hadapan Tuhan. Setiap individu adalah sama di hadapan hukum. Ini bermakna negara dituntut untuk mengamalkan asas demokrasi (Abdul Wahid 1964:31-55; Mahammad Aziz 1965:62).

KONSEP DEMOKRASI

Sikap dan pandangan Iqbal begitu kritis terhadap bentuk demokrasi yang diamalkan dan dipropagandakan oleh demokrasi Barat dalam penilaian Iqbal dibina di atas dasar ketidakadilan secara ekonomi, sosial dan politik. Iqbal menganggap demokrasi Barat hanyalah senjata yang diguna pakai oleh kaum imperialis dan kapitalis Barat untuk mengeksploitasi manusia.

Iqbal menolak konsep demokrasi yang dipropagandakan oleh Barat sebagai bentuk pemerintahan ‘Daripada rakyat dan untuk rakyat oleh rakyat’. Iqbal berpandangan bahawa demokrasi dalam perspektif Islam adalah kekuasaan tertinggi berada di Tangan Tuhan (*supremacy of al-shari'ah*) untuk kesejahteraan manusia secara sempurna dan khalifah sebagai pemikul tanggungjawab daripada Tuhan (Muhammad Aziz 1965:64).

Kekuasaan tertinggi adalah syariah atau peraturan agama. Ketua negara atau khalifah hanyalah individu seperti masyarakat awam yang lain, dia tidak memiliki kekebalan hukum. Dalam perspektif Islam, seorang ketua negara harus mentadbir di bawah hukum syariah yang benar. Jawatan yang dipikulnya adalah amanah daripada rakyat. Semua rakyat memiliki hak politik secara bebas untuk memilih ataupun dipilih. Perhubungan antara pemimpin dan rakyat berdasarkan *bai'ah* atau kontrak ketaatan (Muhammad Aziz 1965:55).

Iqbal juga merujuk kriteria seorang khalifah yang dirumuskan para ulama. Antara kriteria itu ialah berakhlak mulia, tidak cacat mental dan fizikal, memiliki wasasan keilmuan dan integriti dalam hukum Islam (Abdul Wahid 1964:63). Kriteria ini juga sesuai dengan pandangan Ibn Taymiyyah dalam *al-Siyasah al-Shar'iyah* ketika menjelaskan maksud tentang kewajipan para pentadbir mestilah berlaku secara amanah dan adil. Kewajipan rakyat adalah patuh dan taat kepada pemimpin dan tidak mengandungi unsur kemaksiatan kepada Allah SWT (Ibn Taymiyyah 2009:32).

Dalam pentadbiran negara pula, seorang amir atau khalifah mesti bekerjasama dengan para *ahl-hall wal 'aqd* atau dewan majlis syura (Muhammad Aziz 1965:60). Adapun untuk perkara yang secara teknikal, maka urusan tersebut diserahkan urusan kepada pemerintah. Perkara ini dipandang sebagai idea kesepakatan universal di mana merupakan prinsip fundamental teori perundangan Islam sebagaimana sabda Nabi Muhammad SAW “apa saja yang dianggap oleh masyarakat mukmin itu baik, maka di sisi Allah ia juga dipandang baik” (Abdul Wahid 1964:58).

Dalam teori politik Islam, undang-undang Tuhan berada di tempat tertinggi ke atas segalanya dan menjadi kata kunci dalam

pentadbiran negara. Negara dalam perspektif Islam adalah perpaduan umat dalam sebuah sistem politik dan agama sekaligus (Abdul Wahid 1964:60). Dalam pentadbiran dan perundangan Islam terdapat dua hal yang penting dari aspek perlembagaan Negara. Pertama, hukum Allah secara mutlak adalah yang tertinggi. Kedua, kesamarataan kedudukan bagi semua individu di hadapan hukum Allah (Abdul Wahid 1964:53).

NASIONALISME UMAT ISLAM: MILLAT

Pandangan Iqbal, pernyataan “tidak ada Nabi SAW sesudah Nabi Muhammad SAW dan tidak ada ummah setelah Umat Islam” (Mohammad Aziz 1965:25) menjadi orientasi pembangunan umat. Menurut Iqbal lagi kerangka *Muslim Community (Millat)* tertumpu kepada tiga isu, pertama, struktur umum komuniti muslim yang bermaksud persamaan visi dan misi dan sejarah tradisi yang diwariskan daripada Nabi Muhammad SAW. Kedua, keseragaman budaya yang berlandaskan pada akidah. Ketiga, kesinambungan komuniti muslim yang berlandaskan nilai-nilai ideal dan spiritual ajaran Islam dan bukan berdasarkan tempat dan ruang (Abdul Wahid 1964:377-381; Riaz 1977:23-25).

Keistimewaan umat Islam itu terletak pada perpaduan yang dibina atas dasar persamaan keyakinan dan akidah. Dasar semangat perpaduan inilah yang melahirkan rasa nasionalisme umat Islam. Sebuah nasionalisme bermakna mencintai Tanah Air dan kesediaan untuk mati bagi membela kehormatannya adalah sebahagian daripada keimanan seorang mukmin (Abdul Wahid 1964:287; Riaz 1977:79). Corak nasionalisme seperti ini muncul daripada umat yang memiliki karakter yang teguh kerana dibentuk oleh keimanan yang diajarkan oleh Nabi SAW. Dalam hal ini Iqbal mengatakan:

Perbezaan asas antara masyarakat muslim dengan masyarakat yang lain di muka bumi ini ialah terletak pada konsep kita mengenai fahaman kebangsaan. Nasionalisme bagi kita bukanlah perpaduan yang dibentuk oleh bahasa, negara atau identiti kepentingan ekonomi yang merupakan prinsip dasar nasionalisme kita. Tetapi disebabkan kita semua percaya pada satu pandangan mengenai alam semesta ini, dan kita sama-sama memiliki satu sejarah tradisi yang sama. Kita adalah sebahagian daripada masyarakat yang dilahirkan daripada umat Nabi Muhammad SAW. Islam sangat membenci kepada sifat kebendaan dan melandaskan sebuah nasionalisme berdasarkan sebuah gagasan murni yang lalu dengan mengaplikasikan potensi tersebut kepada seluruh individu

secara meluas. Nasionalisme yang baik kerana dasar hidupnya berteraskan individu-individu yang istimewa berkarakter dan golongan cerdik. Nasionalisme yang hakikatnya adalah bersifat kekal dan menyeluruh (Abdul Wahid 1964:378)

Ketika menyampaikan mesejnya kepada rakyat India yang disiarkan secara langsung oleh *Radio All India*, Iqbal mengisytiharkan bahawa kesatuan yang dibina atas keyakinan merupakan makna pepaduan yang sebenar, “Hanya satu perpaduan yang dapat bertahan, iaitu perpaduan yang berdasarkan persaudaraan seagama, yang melampaui fahaman perkauman, kebangsaan, warna kulit atupun bahasa” (Moizuddin 1982:26; Abdul Wahid 1964:375).

Teori Ikatan Rohani sebagai dasar yang memberi semangat nasionalisme umat Islam juga telah lama dibincangkan oleh Ibn Khaldun, dalam istilah beliau *‘asabiyyah*. Dasar ‘ikatan rohani’ yang kukuh melahirkan kesetiaan kepada saudara seagama kepada umat Islam, dan khususnya kesetiaan kepada Allah SWT (Iqbal 2006:174; Ibn Khaldun t.th: 58; Muhammad Aziz 1965: 8). Ia adalah sebuah nasionalisme, yang melahirkan semangat pembelaan (Ibn Khaldun t.th:58). Menurut Idris (2014:11) teori *‘asabiyyah* ini cukup bermakna dan mempunyai kekuatan bagi menjayakan perpaduan ummah, agama dan peradaban yang besar. Hal ini disebabkan dibina di atas dasar persamaan akidah dan persamaan pandangan moral (Asad 1999:32). Peranan agama yang menghakis aspek negatif yang muncul dari fahaman *‘asabiyyah* apabila timbul rasa hasad dengki di antara individu masyarakat sehingga perpaduan kaum dan *‘asabiyyah* dalam konteks bangsa dan negara menjadi penting dalam melahirkan kekuatan dan semangat perpaduan (Ibn Khaldun t.th:66; Idris 2014:32). Dalam konteks tersebut, *‘asabiyyah* lebih kepada semangat patriotisme untuk membela kebenaran dan menegakkan keadilan. Jadi ia lebih kepada semangat patriotisme iaitu perasaan cinta dan menghormati nilai dan kehidupan yang dianuti serta kesediaan untuk berkorban jiwa dan material bagi mempertahankan negara daripada sebarang bentuk pencerobohan dan ketidakadilan (Mohd Nasir 2005:55).

Islam bukan nasionalisme dan imperialisme tetapi perhimpunan bangsa yang menghargai sempadan negara dan perbezaan suku bangsa bagi memudahkan pengurusan bukan untuk mengekang batasan sosial setiap anggota (Iqbal 2006:186). Kepatuhan seseorang kepada Allah SWT merupakan kesetiaan kepada cita-cita diri sendiri dan sekaligus melahirkan kesetiaan untuk melakukan kebaikan yang lainnya. Dalam ungkapan yang penuh makna, Iqbal menyebutkan “*Since God is the Ultimate spiritual basis of all life, loyalty to God virtually amounts to man’s loyalty to his own ideal. All human life is*

spiritual in its origin. Such a perception is creative of fresh loyaties" (Iqbal 2006:174; Mohammad Aziz 1965:7).

KESIMPULAN

Konsep politik dan kenegaraan yang dikemukakan oleh Muhammad Iqbal, dapat dirumuskan sebagai dasar utama pembentukan Negara adalah Tauhid yang mengimplikasikan makna kedaulatan Tuhan (*sovereignty of Allah*). Negara Islam berorientasikan kepada Tuhan, sebagai sumber utama kehidupan (*God is the Ultimate Spritual basis of all life*). Prinsip tauhid akan melahirkan rasa kebangsaan dan kesetiaan kepada saudara seagama tanpa ikatan sempadan. Pengertian sempadan hanya difahami sebagai pengenalan saja. Ini memandangkan ajaran Islam mengkehendaki berlakunya kesejahteraan dan keadilan sejagat.

Kesimpulannya, kedaulatan Tuhan (*sovereignty of God*), Negara Islam berlandaskan kepada Al-Quran, yang merupakan manifestasi kehendak Allah. Merujuk kepada Syariat Islam sebagai sumber hukum dan etika, kebebasan individu dijamin oleh hukum. Prinsip demokrasi yang berteraskan kepercayaan kepada Allah akan melahirkan toleransi ke atas setiap golongan dan kelompok.

Iqbal memilih untuk memberi perhatian terhadap falsafah iaitu asas dan dasar kenegaraan itu sendiri yang dikira tersangat penting. Walau bagaimanapun persoalan sistem boleh berubah, menurut kesesuaian pentadbiran sesebuah negara.

RUJUKAN

- Ahmad Mohamad Aziz. 1965. *Iqbal and The Recent Exposition of Islamic Political Thought*. Lahore: SH. Muhammad Ashraf.
- Asad Muhammad. 2001. *The principles of state and government in Islam*. Kuala Lumpur: Islamic Book Trust
- Asif Iqbal Khan. 1977. *Some Aspects of Iqbal's Thought*. Lahore: Islamic Book Service.
- Gordon, L.R. 1971. *Ideology of Muslim Nationalism* dalam Iqbal; Poet-Philosopher of Pakistan. New York: Columbia University Press.
- Howard, M. Federspiel. 2006. *Indonesian Muslim Intellectuals of the 20th Century*. Singapore. Institue of Southeast Asian Studies.
- Ibn Khaldun, °Abd al Rahman Muhammad. tt. *Muqaddimah*. Kaherah: Maktabah al-Nahdah.
- Ibn Taymiyyah, Taqiyy al-Din Abu al-°Abbas Ahmad. 1991. *al-Siyasah al Shar°iyyah Fi Islah al Ra°i wa al Ra°iyyah*. Maroko: Dar al-Afaq al-Jadidah.

- Idris Zakaria. 2014. *Falsafah Politik Islam dan Kepentingan di Malaysia*. Bangi: Penerbit UKM.
- Iqbal Muhammad. 2006. *The Reconstruction of Religious Thought in Islam*. Selangor: Masterpiece Publications Sdn Bhd.
- 1975. *Secret of The self (Asrar -I –Khudi)*. Terj. Reynold A. Nicholson.
Lahore: SH.Muhammad Ashraf
- Mohammed Maruf. 1977. *Contribution To Iqbal's Thought*. Lahore: Islamic Book Service.
- Mohd Nasir Omar. 2005. *Gagasan Islamisasi Ilmu*. Kuala Lumpur: Utusan Publications & Distributors Sdn Bhd.
- Nicholson, R.A. 1969. *The Secrets Of The Self*. SH. Muhammad Ashraf. Lahore
- Moizuddin, M. 1982. *The Worl of Iqbal*. Lahore. Iqbal Academy Pakistan
- Mumtaz Hasan. 1982. *Tribute to Iqbal*. Lahore. Iqbal Academy Pakistan
- Riaz Hussain. 1977. *The Politics of Iqbal. A Study of His Political Thoughts and Action*. Lahore: Islamic Book Service.
- Syed Abdul Wahid. 1969. *Thoughts and Reflections of Iqbal*. Lahore: SH.Muhammad Ashraf.

*Idris Zakaria
Jabatan Usuluddin Dan Falsafah,
Fakulti Pengajian Islam,
Universiti Kebangsaan Malaysia.
Mel-e: aris@ukm.edu.my